

FAULA XI.

LE TRE VIRTU' A L' OSTARIA DLA PAS.

Avend, com' i savì, fait banca-routa ,
 Trovandse a mal parti , d' pianta ale grele ,
 Con na scudela d' bosch , e con soa bouta
 Andavo tapinand le doe sorele ,
 Cioè la Bona-fede e la Speranssa ,
 Vendend j' armanà-neuv , le storie bele ;
 E pr la pì curiousa circostanssa
 Essend assassina , strachè dal viagi ,
 All' ostarìa dla Pas l' han pià na stanssa
 Pr desse un po' d' ciadel ai so bagagi ,
 E casualment tra lour vnend a dscoure ,
 Esclama la Speranssa..... fè couragi ,
 I spero ch' i l' avrouma finì d' coure ,
 Prchè s' me canocial m' ha nen tradime ,
 I sarouma a bon-port fra poche ore.

L'è vera ch' fin-adess i son falime ,
 E ch' i' l' hai sempre vist d' castei an aria :
 Sorela..... ma i sè voi ch' j' avì andurmime !
 Disend lolì , s' presenta con un' aria
 Smorta , mesa scarnà , tuta piourosa
 Na Dona verament nen ordinaria :
 Ma a l' era mal fourgià , bruta , scarousa ,
 E andava brboutand 'l *dies irae*
 Ciamand pr le sing piaghe un po' quai-cosa.
 Chi seve (una ai rispond)..... forsi ch' i vire
 'L mond com' fouma noi..... da-dont avnive ?
 A smia ch' j' abie mal , e ch' i sospire !
 Am riconossve nen ? prchè stupive ?
 I' son la Carità vostra sorela ;
 E voi , mie care seur , seve ancour vive ?
 D' l' colp j' aitre l' abbrasso pr basela :
 E chila a j' ha soggiunt..... o Fije, guardeme,
 Guardè ant che stat a venta ch' im rabela !
 A j' è pinen un can ch' veuja alogieme ;
 Trovandme disperà , son fin andaita
 Ciamand ai Ospidai pr ricovreme ,
 Ma cosa servlo mai ! tant i' son staita
 Sforssà dal freid , la fam , e la miseria
 A scapè da là-drint , sno j' era faita !
 Pr vive coust esposta all' intemperia ,
 Abandonà da tuit , sempre schergnìa ,
 Sorele , i' l' hai decis d' andè an Siberia.

Eh-bin npi iv farouma compagna :
E forsi ch' ant coul clima noi trovrouma
An mes a coula gent dura , abrutia ,
La pas e coul boneur ch' i sospirouma.

